

同安縣志

卷廿九人物錄
人物錄文

儒林

卷三十人物錄武功

卷卅一

同安縣志卷之二十九

儒林錄

通天地人謂之儒儒所以經緯天地彌綸彝憲也同自紫陽過化理學名儒後先輩出民風丕變遠追鄒魯士君子之有益於人心風俗非淺鮮也清末變法維新競尚科學雖大勢所趨不得不爾然青衿佻達時有所聞甚而學說紛歧至不免爲倫常之玷者有之有心世道者時切隱憂則真道真儒尤當詠高山仰止矣志儒林

宋

許升

柯翰

石起宗

王力行

呂大奎

邱葵

明
陳金鉞

黃文炤

吳聰

鄭得瀟

清
黃濤

宋

許升字順之號存齋紹興二十三年朱子簿同安升年十三從游最早朱子五年秩滿復從學於建陽其學益進朱子謂有得於內嘗書存齋二大字授之使扁書院復爲之記臨別宿雲際寺朱子贈以詩曰薄暮投花縣聯車入翠微長林生缺月永夜照寒扉清話欣無斃離懷悵有違勉哉強毅力千里要同歸又云門前三徑長蒿萊愧子殷勤千里來校罷遺書卻歸去此心元自不曾灰至家朱子兩與書微示養氣修齊之意在衰經之中動閑禮度擬古自裁朱子嘉之令校程氏語錄升曲折訂正論量朱子答書甚悉居家偕同志陳齊仲肄業淨隱寺又與石子重徐元聘柯國材陳汝器王近思等友善後遍交四方之士若范伯崇廖德明林擇之許敬之等或相過從或往來書問論道肄業朱子稱其恬澹靜退無物欲之累及卒爲文祭之今配享朱子祠中又祀鄉賢所著有孟子說禮記解等書並湮滅

無傳

道南源委

柯翰字國材守道恬退篤於正學邑居教授常百餘人朱子爲同安主簿時屬治學事內行峻潔衆嚴憚之久皆化服國材講禮記朱子申其說又與反覆辨論仁體忠恕易卦春秋詳見朱子文集國材葺廬以居取楊子所記二年通一經者以名

其堂朱子爲作一經堂記及其歿也朱子以文哭之有曰探討之勤白首不置弗索於祿弗媚於時又曰唯君之德剛毅近仁望之可畏卽之可親可想見其人矣

祀鄉賢

閩書

石起宗字似之乾道五年進士第二人由勅局刪定官召試館職條對時務辭義卓然帝覽奏稱善除秘書省正字再遷權倉部郎官會當輪對力言君子小人之情狀與天下治亂安危之機又言妄啟邊釁以開兵端不可不戒通判漳州寬鹽禁令民輸米自槩斛禁卒刃民於市守欲末減力爭置以法州人繪像祀焉知徽州除提舉浙西常平入爲尙書吏部員外郎引對奏言德雖聖人所能躬修治非聖人所能獨致願詔大臣盡公任責以破羣臣徇私媮惰之習又奏乞取仁宗洪範政鑒與敬天圖列置座右帝嘉歎久之命秘書省繕錄以進後以考較類試卒於院起宗善字畫備數家體秘書省汗青軒碑其所書也尤工詩賦好學不倦俸餘悉市書嘗言藏書數千卷勝良田萬頃云所著有經史管窺

參閩書中興館閣錄通志藝文

王力行字近思淳熙間與陳易楊至楊履正劉鏡皆遊朱文公門文公謂力行明敏有餘而少持重因勉以爲己工夫自是苦學善問深得其旨所著朱氏傳授支派

圖文公語錄一卷大全集載其問答甚多祀鄉賢

參道南
源委

呂大奎字圭叔少嗜學師事王昭復昭復師陳淳淳師朱文公故圭叔得紫陽道學之傳泉之通經學古擢高第者皆出其門登淳祐七年進士第一甲因上書言及執政授潭州提舉司幹累遷吏部侍郎兼崇政殿說書以操南音出知興化軍俸米盡輸中戶以下賦德祐元年轉漳州軍未行屬蒲壽庚率知州田子真降元捕圭叔署降表不署將殺之適門人有爲管軍總管者扶出至家乃以平生著作泥封一室遂變服逃海島中壽庚遣兵追之將逼授之官追者及問其姓名不答壽庚怒而殺之年四十九圭叔著書盡燬於賊其易經集解春秋或問孟子論語學易管見行於世者皆門人所傳邱葵贊曰泉南名賢紫陽高弟造詣既深踐履復至致身事君舍生取義所學所守於公奚愧元孔公俊建大同書院祀朱文公以圭叔配焉又祀鄉賢并忠義祠

參閩書
南安志

邱葵字吉甫爲諸生居海嶼中號釣磯風度凝然如振鷺立鶴蚤有志於紫陽之學

初從辛介甫繼從信州吳平甫授春秋親炙呂大奎洪天錫之門最久宋末科舉廢絕意進取杜門刻志厲學耕釣自給不求人知景炎元年大奎遇害葵痛憤忘

生爲詩感激壯烈晚一意著書所著易解疑書口義詩直講春秋通義禮記解四書日講經世書聲音既濟圖周禮補亡後元遣御史馬伯庸來徵託種圃已自匿而率達魯花赤賁幣至家力辭有卻聘述詩一首庸等取其遺書以去故其著述多無傳今惟存周禮補亡及釣磯詩集卒年九十配享朱子祠中又祀鄉賢門人

呂椿克紹其學

閩書續宏簡錄林滄湄文集合參

明

陳金鉞字時仰號毓泉莊江人萬歷甲午歲豐城李氏孟誠以正修之學倡道閩中獨陳時仰金鉞以諸生稱高弟而豐城推同有三陳金鉞及族子從新其一某也金鉞之學於居敬窮理之緒確然精密嘗曰吾身有大威儀總一敬而已緝熙敬止自流爲仁敬孝慈信敬用五事自符於貌言視聽思嗚呼我小子其敢夙夜不敬又曰大德不踰閑小德出入可也此可恕人非所律已守道之士寧拙毋巧寧拘於道內毋溢於道外步步收斂至德性堅定之後自然員融而不滯矣何喬遠極稱其學

黃文炤字麗甫號季敬參政文炳弟也爲晉江諸生久困後謝去專性命之學潛心

力行述經談道其於朱陸王氏異同一以朱子晚年定論爲折衷郡縉紳皆敬異之而何喬遠尤加推重嘗疏薦於朝未及徵直指興化李公復以學行薦會郡人黃蔣二閣學在直私擬引新會餘干例優之爲忤者所格而止隱南臺山中跌坐著書題之曰極高明鳳凰千仞素貧賤鷦鷯一枝好獎士類片善必揚念朝野多故疏牀敝席不敢自逸嘗柬林孕昌句云天上有人調玉燭山中許我坐春臺又曰四郊多壘懷司馬一籌莫展愧仲達其草茅杞憂如此崇禎戊寅南安斗櫓之會起者相望文炤方講學筍江出片紙諭立散去乙酉年登九十琉球國入貢道溫陵者以幣乞書卻之吏部尙書張肯堂薦疏曰品高嵩岱學遡關閩不但鄉邦羽儀實爲盛朝著蔡行年九十稱道不亂憂國倍殷屢登薦剡未受恩綸允宜特授國子監學正職銜仍行有司以禮存問後隱輪山之北年九十六終所著有道南一脈兩孝經仁詮太極圖江學經緯諸書葉向高序兩孝經曰兩孝經者季敬取禮經之言孝者彙而列之以儷於孝經故稱兩也孝經大而禮經詳如大學之經傳互證但事不分屬義各自見故不可爲傳而並稱經卽此兩經而六經之蘊具矣嘗自大江以南至雲間訪陳繼儒論業大相歡契遍歷諸名勝又嘗刻老彭

觀井圖以寓遠害全身之指學者稱爲黃布衣先生

吳聰字伯俊號默齋溪邊人究心理義之學領弘治辛酉鄉薦性恬淡不樂仕進杜門著書一以宋明諸大儒爲宗四方從游者日衆乃爲闡明蔡虛齋學說後易學日廣而其教益尊學者咸稱之曰默齋先生授蘇州府教授時大理寺丞林希元尙書蔡克廉參政王時儉知府何元述參議莊一俊己丑進士莊壬春皆默齋門下士也卒年四十有五其婿莊壬春爲撰墓志所著有四書解易經存藁林希元爲之輯閱刊行

吳族譜莊壬春志稿吳錫琮探

鄭得瀟字慕生號蘧廬子在坊里池仔人沈酣經史年九十餘尙手不釋卷與莆田貢士鄭郊最友善林惕菴令澈浦延得瀟講學得瀟爲解孝經刊布之明亡羈隱海濱自號海濱遺佚益究心於易理日以著作自娛標其讀書處曰定雲樓著有定雲樓五經通義易研廣孝經大學定本周禮挈領定雲樓史統我見如是古文信好編文學指南蘧廬近吟選等書得瀟學究天人爲儒理正宗其我見如是一書上卷疏觀天人分途之始中卷深觀身心性命保合太和之理下卷曠觀大造氣化流動充滿之意都文八十三首皆千古聖人心印發先儒所未發爲有關性

道之文

陳延香
訪稿

按嘉慶縣志載鄭得瀟爲康熙間諸生一試不遇遂棄去此誤也議員陳延香
尙有家藏得瀟手著原書其廣孝經大學定本自序有云崇禎辛巳閩輪山舊
學八十三叟鄭得瀟慕生甫識迨烈皇甲申殉國年已八十有八矣復經順治
十八年已達一百四歲必無於康熙間應試爲諸生之理況得瀟原著自號海
濱遺佚又與邑人鄭牧仲義門王肖槐相結契皆以氣節自負則當時之不肯
應清廷考試更不煩言而解舊志不無傳聞之誤且列諸文苑亦未確茲謹正
之

清

黃濤字天水號文川積善錦宅人由優貢中乾隆庚午順天舉人聯捷進士任湖北
長樂知縣有政聲濤爲諸生時與兄江講濂洛關閩之學天性孝友出入必偕怡
怡如也獨至絳帳授經則丰裁峻整言笑不苟每以敦品立行爲諸生勗晚歲主
講玉屏書院進諸生解經析義課程又益嚴密閩南學者仰之如泰山北斗嘗匯
宋儒學說著質疑錄以傳授生徒並梓有錦江詩古今文集行世

同安縣志卷之三十

武功錄

治世以文勘亂以武二者不可偏廢也同地濱海其人民熟於港汊沙綫好勇尙義自古已然勝朝以來臺澎又歸版籍邑遂爲全省軍事要區統計提督軍務至二十餘人功烈之偉爲全省冠道光朝諭旨至云同安爲武功最盛之區良非偶也雖然德相俾斯麥有言自古未有戕殺同種而以爲功者則美哉猶有憾也究之有春生而無秋殺雖天地亦窮於所用則後之尙武者尤當知所先務矣志武功

漢 許 潑

宋 蘇光誨

元 林天祥

明 郭 濬

陳則賡

清 陳汶環

葉元齡

郭芝英

陳 昂

許 福

洪公掄

吳 楠

邵應魁

盧若驤

林莊雄

莊渭陽

盧 恩

張 正

魏平

王天貴

林宗泰

蔣熺

郭新

林永山

許忠

方劉進

方長生

劉執忠

吳陞

魏國泰

陳倫炯

陳芳

陳壩

胡貴

葉應龍

林君陞

高華松

方文柱

柯連英

吳必達

葉時茂

李耀先

蔡攀龍

黃有才

謝恩詔

孫全謀

陳元成

楊華

李光顯

陳逢時

林六韜

黃振玉

邱良功

王得祿

楊康靈

劉求生

林廷福

陳光求

林奎章

陳登捷

李尙華

曾允福

趙世芳

蒲立勳

李廷鈺

李增皆

郭揚聲

吳建勳

文成才

蔡潤澤

陳大琮

蕭南樞

許瑞聲

林建猷

顏青雲

吳鴻源

陳世榮

劉興邦

吳永宗

吳榮輝

陳邦俊

漢

許潑字元亮河南許州人西漢武帝朝爲左翊將軍駐師於郡之西南百里境上世傳其址爲營城便宜調度十年閩越平以反覆數爲邊患復蒙勅旨永鎮斯土銅符虎節兵衛森嚴以久戍爰卜居於五壚山下遂家焉鄉之諺曰未有同安先有許督卽其事蹟也許督當漢時閩地紛擾不定首開草昧厥功盛矣卒武帝後元元年諡武靖子十五人分鎮閩地

採許順之族譜

按許潑事正史無所考舊志不載惟宋儒許存齋族譜累世相承載其墓在邑從順里五虎山之西墓表題曰故漢上柱國左翊將軍許公墓其子孫皆世守之至今罔異考文獻通考上柱國柱國楚之寵官歷代無聞至後魏始有柱國大將軍位在丞相上凡佐命聲實俱重者始居此職威權如此之重似正史不應缺略惟據後周官制則謂上柱國柱國以酬勳勞並爲散官實不理事隋史亦云功官至柱國咸是散秩無復統馭或者當時駐師營城因閩越事平已屬散秩故正史不載其事耳附此備考据族譜營城又名營城巷卽今本邑之小

西門

宋

蘇光誨父益乾符中隰州刺史自光州固始隨王潮入閩光誨與留從效誅叛將黃紹頗從效表爲漳州刺史陳洪進憚之計召至同安爲大第留不遣密使人之漳州奪其任遂爲同安人雍熙元年盜起游洋光誨夕殪盜魁十餘人送首級於州將喬維岳太宗召赴闕遷左衛將軍太平興國二年與洪進納土任職屯田沒贈上將軍武陵侯子仲昌天聖二年殿試被勳致三班官歷任荆南北路提點刑獄知宜紹復三州終左屯衛將軍以政績贈太師福國公子孫累世貴盛爲同喬木子紳天禧進士

探府志以上
吳錫琮補

元

林天祥字時若嘉禾里人嘗司常平倉不屑升斗樂自韜晦與漁樵偶會鄰賊掠其里避地往漳及歸邑再有警則率里人築堡竭力捍禦老稚賴之爲人內寬夷而外和易無迫阨之度躁矯之容上則交爲其誠下則各得其欲年六十八卒里人

哀悼如其所親

舊志節林
登州集

明

郭濬字文遜後郭人多謀略宏治四年賊聚亂石碓嶺總兵官馬公聞其名命從征

時賊勢猖獗莫能當其鋒濬奮不顧身率衆捕之有功諸大吏咸曰文遜雖無一命之寄然爲國之心則有不可磨者請於朝授冠帶榮之

舊志

葉元齡秉乾孫嘉靖間漳贛寇發元齡應義捧郡檄督機兵於上杭衝風冒雪蒙犯烟瘴涉歷巖崖荆棘間與士卒同起居晝不安坐夜不貼席食不下咽幾一年旣而大兵四集齊力奮討渠魁授首凶黨破滅積年逋寇一朝掃除上功論賞錫幣帛郡縣卽家致勞邑人林希元爲序贈之

許福號西浦嘉靖戊子舉人乙未進士歸家養親幾二十年值倭警團結鄉社邊方

無虞未仕卒

舊志

邵應魁字偉長號榕齋幼穎慧弱冠操舉子業適俞大猷來視金門所募從之游遂徙業焉丙年雋武闈丁未聯成進士同登武第自應魁始已授所鎮撫贊畫南贛軍門贛多峒賊奉檄往諭賊以兵恐之不動以妖治挑之復不動竟俯首聽撫歸報合中丞疏其可大用乙卯倭犯浙詔徵天下材官總制張公以應魁隸俞大猷幕下大猷喜曰邵撫軍來倭不足平矣時倭勢猖獗應魁提兵據平望橋以待比至以偏師繞其後追斬溺死千餘人中丞張景賢奇之令統巨艦駐洋山島夷所

出沒也。諜以衢山之急報疾趨之。倭以二艘誘戰薄暮追至蒲灣。諸艘蜩起應魁。率舟師乘風衝犁。平明至馬蹟。創甚猶裹血奮呼。殊死戰。賊乃潰去。大猷親爲傅藥解衣。仍令移師吳淞。是時嘉定急則轉嘉定。上海急則轉上海。江陰急又轉江陰。敵無不攻應。魁無不應。而川沙窪之擒斬尤多。明年大猷晉都督鎮浙。乞應魁與俱。懸賞得選鋒三百人。犒之。令撓賊。賊不動。應魁曰：「是狃我也。」會大雪。提三百人披簑持火藥。夜半潛抵賊柵。懸簑藥之風發火熾。壁上下如赭。大兵鼓譟進焉。賊多焚死。是役用奇以少擊衆。號爲冠軍。於是總制胡公檄令督兵黃審。港時倭大至。天色已晚。聯舟爲營。應魁語諸將曰：「乘其未定一鼓可擒也。」令我兵各標雙燈直衝賊艘。炮弩齊發。呼聲振天。賊焚溺死者無數。餘寇遁走茶山。北洋窮力追之。再戰再捷。未幾諜報倭將入七了港。乃設伏。賊後自以大兵迎敵戰。酣伏起來。擊大破之。追至乍浦。衝突沈倭艘二。御史上功。陞南直隸游兵把總。兵部叙功。復陞永寧衛指揮使。旋把總劉家河。明年復把總。圖山巡歷江海。不避風濤。有倭至。擊之三片沙。沈其二舟。斬首甚多。陞福建都司署都指揮僉事。誥授昭勇將軍。封贈父祖如其官。將赴閩而監軍唐順之移書撫按。請以閩銜領浙直事。專守江南。

而倭闌入江北總兵盧韓被劾詔獄波及應魁遂解職日與諸名公賡詩倡和既而劇賊曾一本橫行粵中總督吳桂芳請以應魁參將廣惠潮提哨船不滿三十值賊艘百餘乘夜截擊獨以中軍當其衝自寅及辰督戰愈力手射殺賊圍乃解復合諸軍大戰破之而閩巡按陳公爲粵人遽以未履閩任中應魁遂求去歸而杜門卻掃校讐左史寄情詩酒大輪外陽慈雲天馬諸山皆有標題孝友天性俸入恣伯兄出入不問金門有園材之趣兄心欲之卽移家豪山而推宅與兄巡憲及郡僚行部往返輒枉車騎得其詩乃去然未嘗有所千年七十六卒著有射法

詩稿傳世

舊志節清
白堂稿

莊渭陽萬歷癸未武進士授廣海守備陞潤州遊擊以瓊州黎峒不靖題陞瓊崖參將有平黎功遷五軍七營左參將告養歸卒瓊州人祀之名宦

舊志

陳則賡郡諸生聰敏多智天啟庚申壬戌紅夷猖獗賡時爲軍門贊畫以計靖之臺

省交章叙功第一予官不受

舊志

郭芝英字耀豪積善寮東人明末以勦寇功授金門游擊狀貌英偉力舉千鈞敵望而畏之凡齎糧運輸調遣進發多出其指畫晉光祿大夫太子太師封忠奮伯

舊志

洪公掄字廷揚號鼎銘後豐港人累世同居少儻有大志壯年從其父北游津門
咨訪邊事有借筋請纓之思已而偕伯氏渭文南游雷陽渭文入副總兵楊應春
幕公掄累官守備萬歷四十二年屬有征黎之役制府檄五路衛分道進發諸將
紛議剿撫公掄受應春命入刀港德霞諸洞委曲撫諭皆悅服隨之出見應春受
賞而去傳告鄰部駸駸向化兩廣坐營參將萬紀欲乘其不備倖奇功夤夜進兵
夷覺伏林箐以伺拏矢雨注師殲焉公掄憤氣激暴殞黎夷憐之歸其櫬子旭累
官中提督封忠振伯次子暄爲水澎游擊

節畱菴文集

盧若驥賢聚人尙書若騰弟以舉義授總兵官若驥騰族弟崇禎間若騰官樞曹驥
父文字謂天下扼塞要害兵馬芻糗之籍盡在樞曹命驥就若騰京師講求後歷
任三山長溪裨將治軍恤民聲藉甚唐王立於閩授游擊將軍從扼守盤山關者
年餘旋受恢撫閩浙之命血戰閩粵間屢著勞績

采畱菴文集

盧恩若騰同族從鄭國公鄭鴻達糾義旅海上幹材敏練鄭國公深倚之官贊畫通
判晉昭毅將軍正總兵都督僉事

留菴文集

清